

Na osnovu člana 68. Ustava Islamske zajednice u Bosni i Hercegovini-prečišćeni tekst, Sabor Islamske zajednice u Bosni i Hercegovini na osmoj redovnoj sjednici održanoj u Sarajevu 21. ševvala 1443. h.g., odnosno 22. maja 2022. godine donosi:

PRAVILNIK O DODJELI MURASELE

Član 1.

(Predmet pravilnika)

Ovim pravilnikom uređuje se procedura davanja, uskraćivanja i povlačenja murasele, nosioci murasele, uslovi za dobivanje murasele te druga pitanja koja se odnose na institut murasele.

Član 2.

(Pojam)

- (1) Murasela je pisano ovlaštenje, kojim se nosioci vjerskog autoriteta: muftije, muderisi, imami i hatibi, muallimi i muallime, vjeroučitelji i vjeroučiteljice, odgajatelji i odgajateljice u ustanovama Islamske zajednice u Bosni i Hercegovini, urednici vjerskih programa i sadržaja u medijima Islamske zajednice u Bosni i Hercegovini i drugi nosioci vjerskog autoriteta, ovlašćuju da tumače učenja islama u skladu sa maturidijskim akaidom, hanefijskim mezhebom i ustavnim vrijednostima Islamske zajednice u Bosni i Hercegovini. Murasela se daje licima koja posjeduju stručne i moralne kompetencije potrebne za izbor ili imenovanje u odgovarajuću službu u Islamskoj zajednici.
- (2) Zasnivanje službe nije validno niti može proizvesti pravna dejstva bez prethodno pribavljene murasele.

Član 3.

(Ovlaštenje za davanje, uskraćivanje i povlačenje murasele)

- (1) Muraselu daje reisu-l-ulema Islamske zajednice u Bosni i Hercegovini kao njen poglavar i vrhovni muftija u skladu sa ovlaštenjima, dužnostima i odgovornošću preuzetih putem Menšure te na osnovu Ustava i drugih normativnih akata Islamske zajednice u Bosni i Hercegovini.
- (2) Reisu-l-ulema odluku o davanju, uskraćivanju ili povlačenju murasele donosi na osnovu ovlaštenja poglavara i vrhovnog muftije i na osnovu procjene najboljih razloga i interesa Islamske zajednice.
- (3) Povlačenjem murasele prestaje ugovor o službi.

Član 4.

(Murasela muftiji)

- (1) Reisu-l-ulema daje muraselu muftiji ovlašćujući ga i nalažući da tumači učenja islama u okviru nadležnosti propisanih normativnim aktima kojima se uređuju nadležnosti i rad muftija.
- (2) Murasela muftiji se daje nakon njegovog imenovanja potvrđenog od strane Sabora Islamske zajednice u Bosni i Hercegovini i nakon polaganja zakletve pred reisu-l-ulemom i Saborom.
- (3) Murasela muftiji se izdaje na period koliko traje njegov mandat, a vrijedi i u slučaju uzastopnog ponovnog imenovanja na još jedan mandat.

Član 5.

(Murasela imamu)

- (1) Reisu-l-ulema daje muraselu imamu ovlašćujući ga i nalažući da tumači učenja islama u okviru nadležnosti propisanih normativnim aktima kojima se uređuju nadležnosti i rad imama.
- (2) Murasela imamu se daje prilikom njegovog prvog prijema u službu, nakon pripravničkog staža, nakon što se ustanovi da imenovani posjeduje stručne i moralne kompetencije potrebne za imamsku službu.
- (3) Murasela imamu važi sve dok obavlja imamsku službu, odnosno do njenog opoziva.
- (4) Zahtjev za davanje murasele imamu podnosi muftija na prijedlog izvršnog odbora medžlisa kod kojeg imam stupa u prvu profesionalnu službu.
- (5) Murasela izdata imamu vrijedi i u slučaju njegovog imenovanja na mjesto glavnog imama.

Član 6.

(Murasela za hatibske i muallimske poslove)

- (1) Murasela data imamu predstavlja ovlaštenje imamu i za vršenje hatibskih i maullimskih poslova.
- (2) U slučaju potrebe, na zahtjev muftije a na osnovu prijedloga izvršnog odbora nadležnog medžlisa, murasela se može izdati i samo za obavljanje hatibskih poslova ili samo za obavljanje muallimskih poslova, licu koje ispunjava potrebne uvjete za obavljanje tih poslova.
- (3) Učenicima i studentima koji u okviru svoje stručne prakse obavljaju hatibske poslove, ovlaštenje daje nadležni muftija.

Član 7.

(Murasela muderrisu u medresi)

- (1) Reisu-l-ulema daje muraselu muderrisima, odnosno profesorima i predavačima u medresama Islamske zajednice koji predaju: Kiraet, Akaid, Fikh, Tefsir, Hadis, Ahlak i druge islamske discipline, ovlašćujući ih i nalažući da tumače učenja islama u okviru nadležnosti propisanih normativnim aktima medrese i Islamske zajednice, poštujući pravila struke, odnosno obrazovne i pedagoške standarde prihvaćene od strane nadležnog organa Islamske zajednice kroz odgovarajuće akte.
- (2) Murasela muderrisima u medresi se izdaje na prijedlog direktora medrese uz prethodno pribavljeno mišljenje nadležnog muftije i dokaz o ispunjavanju stručnih i moralnih kompetencija neophodnih za prijem u službu.
- (3) Murasela važi sve dok imenovani vrši službu iz stava (1) ovog člana, odnosno do njenog opoziva.
- (4) Murasela važi i u slučaju da osoba kojoj je data pređe u drugu medresu Islamske zajednice i nastavi sa obavljanjem iste službe za koju je dobila muraselu.

Član 8.

(Murasela muderrisima na fakultetima)

- (1) Reisu-l-ulema daje muraselu muderrisima, odnosno profesorima i predavačima na fakultetima Islamske zajednice koji predaju: Kiraet, Akaid, Tesavvuf, Fikh, Tefsir, Hadis, Ahlak i druge islamske discipline, ovlašćujući ih i nalažući da tumače učenja islama u okviru nadležnosti propisanih normativnim aktima Islamske zajednice i fakulteta, poštujući pravila struke,

odnosno obrazovne i pedagoške standarde prihvaćene od strane nadležnog organa Islamske zajednice kroz odgovarajuće akte.

- (2) Murasela muderrisima na fakultetu se daje na prijedlog dekana uz prethodno pribavljeno mišljenje nadležnog muftije i dokaz o ispunjavanju stručnih i moralnih kompetencija neophodnih za prijem u službu.
- (3) Murasela se daje prilikom izbora u prvo akademsko zvanje, odnosno prilikom prvog prijema u službu na fakultetu i važi sve dok imenovani vrši službu na fakultetu, odnosno do njenog opoziva.
- (4) Murasela važi i za eventualno izvođenje nastave na drugom fakultetu ili za prelazak u službu na drugi fakultet Islamske zajednice u Bosni i Hercegovini, odnosno drugu obrazovnu ustanovu Islamske zajednice.

Član 9.

(Murasela vjeroučitelju)

- (1) Reisu-l-ulema daje muraselu vjeroučitelju ovlašćujući ga i nalažući da tumači učenja islama u okviru nadležnosti propisanih normativnim aktima kojima se uređuju nadležnosti i rad vjeroučitelja.
- (2) Murasela vjeroučitelju se daje prilikom njegovog prvog prijema u službu nakon što se ustanovi da imenovani posjeduje stručne i moralne kompetencije potrebne za vjeroučiteljsku službu.
- (3) Murasela vjeroučitelju važi sve dok obavlja vjeroučiteljsku službu, odnosno do njenog opoziva.
- (4) Zahtjev za davanje murasele vjeroučitelju podnosi muftija na čijem području vjeroučitelj stupa u službu.
- (5) Jednom izdata murasela vjeroučitelju važi i u slučaju njegovog prelaska na službu u drugu obrazovnu ustanovu.

Član 10.

(Murasela odgajatelju u ustanovama Islamske zajednice u Bosni i Hercegovini)

- (1) Reisu-l-ulema daje muraselu odgajatelju ovlašćujući ga i nalažući da tumači učenja islama u okviru nadležnosti propisanih normativnim aktima kojima se uređuju nadležnosti i rad odgajatelja.
- (2) Murasela odgajatelju se daje prilikom njegovog prvog prijema u službu nakon što se ustanovi da imenovani posjeduje stručne i moralne kompetencije potrebne za službu odgajatelja.
- (3) Murasela odgajatelju važi sve dok obavlja poslove odgajatelja, odnosno do njenog opoziva.
- (4) Murasela odgajatelju u ustanovi Islamske zajednice daje se na prijedlog rukovodioca ustanove uz prethodno pribavljeno mišljenje nadležnog muftije.
- (5) Jednom izdata murasela odgajatelju važi i u slučaju njegovog prelaska na službu odgajatelja u drugu ustanovu Islamske zajednice.

Član 11.

(Murasela uredniku vjerskog programa i sadržaja u medijima Islamske zajednice u Bosni i Hercegovini)

- (1) Reisu-l-ulema daje muraselu uredniku vjerskog programa i sadržaja u medijima Islamske zajednice u Bosni i Hercegovini ovlašćujući ga i nalažući da tumači učenja islama u okviru

nadležnosti propisanih normativnim aktima kojima se uređuju nadležnosti i rad urednika vjerskog programa i sadržaja.

- (2) Murasela uredniku vjerskog programa i sadržaja se daje prilikom njegovog prvog imenovanja na mjesto urednika vjerskog programa i sadržaja, nakon što se ustanovi da imenovani posjeduje stručne i moralne kompetencije potrebne za urednika vjerskog programa i sadržaja u medijima Islamske zajednice u Bosni i Hercegovini.
- (3) Murasela uredniku vjerskog programa i sadržaja važi sve dok obavlja posao urednika vjerskog programa i sadržaja, odnosno do njenog opoziva.
- (4) Zahtjev za davanje murasele uredniku vjerskog programa i sadržaja podnosi rukovodilac medija Islamske zajednice u Bosni i Hercegovini uz prethodno pribavljeno mišljenje Zamjenika reisu-l-uleme.
- (5) Murasela izdata uredniku vjerskog programa i sadržaja u jednom mediju vrijedi i u slučaju njegovog imenovanja na mjesto urednika vjerskog programa i sadržaja u drugom mediju Islamske Zajednice u Bosni i Hercegovini.

Član 12.

(Vremensko važenje murasele)

- (1) Murasela vrijedi do isteka mandata na dužnosti ili prestanka službe za koju je službeniku izdata murasela, odnosno do njenog opoziva od strane reisu-l-uleme.
- (2) Opoziv murasele se vrši u slučaju ostavke i napuštanja, odnosno prestanka službe, te u slučaju utvrđene povrede islamskih normi.
- (3) Opoziv murasele iz prethodnog stava vrši se odlukom na prijedlog organa kod kojeg službeniku prestaje služba.

Član 13.

(Stručne kompetencije)

- (1) Stručne kompetencije potrebne za dobivanje murasele dokazuju se ispunjavanjem uvjeta potrebnih za prijem u službu propisanih normativnim aktima Islamske zajednice i aktima organizacione jedinice, odnosno ustanove Islamske zajednice.
- (2) Ovlaštenik za podnošenje prijedloga reisu-l-ulemi za davanje murasele uz prijedlog dostavlja i dokaze o stručnoj kompetenciji, odnosno o ispunjavanju traženih uvjeta, potvrđujući to svojim potpisom.
- (3) Murasela izdata na temelju netačnih ili lažnih dokaza o ispunjavanju uvjeta smatra se ništavnom, a podnosilac podliježe disciplinskoj ili mogućoj drugoj odgovornosti.

Član 14.

(Moralne kompetencije)

- (1) Kandidat za dobivanje murasele dužan je dostaviti pisanu izjavu kojom potvrđuje da ne čini ili nije činio radnje protivne islamskim moralno-etičkim kriterijima i šerijatskim propisima kojima se narušava ugled službenika Islamske zajednice.
- (2) Lažni iskaz o moralnim kompetencijama, utvrđen kao takav u postupku davanja murasele ili naknadno, za posljedicu ima povlačenje izdate murasele, te moguću disciplinsku ili drugu odgovornost.

Član 15.

(Forma murasele)

- (1) Murasela se daje u formi pisanog dokumenta na obrascu kojeg propisuje Uprava za vjerske poslove Rijasetu Islamske zajednice.
- (2) Dokument mora sadržavati: memorandum reisu-l-uleme, broj djelovodnog protokola i datum izdavanja dokumenta, podaci o licu kome se daje murasela, naziv službe koju će sticalac obavljati, potpis reisu-l-uleme i pečat.
- (3) Murasela se potpisuje u četiri primjerka od kojih se jedan dostavlja podnosiocu prijedloga, jedan licu kome se izdaje murasela, jedan za arhivu Rijasetu i jedan za registar izdanih murasela kojeg vodi Uprava za vjerske poslove Rijasetu Islamske zajednice.

Član 16.

(Dodjela murasele)

- (1) Muraselu uručuje reisu-l-ulema, odnosno drugo lice po njegovom ovlaštenju.
- (2) Uprava za vjerske poslove će donijeti uputstvo kojim će se urediti procedura podnošenja zahtjeva za dodjelu odnosno opoziv murasele.

Član 17.

(Retroaktivno izdavanje murasele)

Svim službenicima kojima murasela nije izdata ranije, a na koje se odnosi ovaj pravilnik, ista će se izdati retroaktivno po proceduri koju propisuje ovaj pravilnik.

Član 18.

(Zakletva)

Lice kojem se dodjeljuje murasela prilikom dodjele polaže zakletvu koju potpisuje.

Član 19.

Akt o dodjeli, odnosno opzivu murasele objavljuje se u Glasniku Rijasetu Islamske zajednice.

Član 20.

(Završne odredbe)

Ovaj pravilnik stupa na snagu danom donošenja i isti će biti objavljen u Glasniku Islamske zajednice.

